

CARTA UU JEE NI TEE SAN PABLO APOSTOL NUU TIMOTEO

¹ Máá rí cúa Pablo, apóstol Jesucristo, chi súcuan ni nujnahan ni Yaā Dios ni tají yá ruhū jeē nácani ri jnūhun jeē ni jéjnūhun ya jeē cótecu yō nií cáni siquī jeē yíhi yó ndaha Cristo Jesús. ² Te tée ri carta yáha cuájēe nuū rō Timoteo, chi cúa ro nájnūhun sēhe ri jeē maní rí jiín. Te fúhun ni rí jeē Tatá yō Yaā Dios jiín Jítoho yō Jesucristo, na saha ga yā jeē váha róhó, te cundáhú ni yā rohó, te saha ya jeē coo ndeyí coo sií ni rō.

Jeē nácani de jnūhun Cristo

³ Níní tu náā ni rí cacān tahú rí jehē rō nuū Yaā Dios nduú fíuú, te nácuatáhú rí nuū yā jeē siquí rō. Chi nuū maá yá jejníñu ri, nájnūhun ni casáha tāca jíí rí, te íyó ndoo ánuá rí nuū yā. ⁴ Te núcūhun ni rí jeē ni ndáhyū rō ná ni quenda ri cuahān rí. Te cúa ni rí ndacoto jnáhan yó, návāha cusíí ndasí ni rí. ⁵ Te núcūhun ni rí jeē váha ndije cándíje ró Cristo, nájnūhun ni candíje náná jéhnu ró Loida, jiín náná rō Eunice xihna gā. Te cúcáhnu ni rí jeē suni súcuan cándíje máá ró vijna.

⁶ Te jeē yúcuan nástíhví ni rí rohó jéē na cóndíhví gā ni rō jiín táchū jeē ni jéhe Yaā Dios nuū rō jeē nácani ró jnúhun ya. Te táchū un ní nihín rō ná ni tee ri ndaha ri xiní rō. ⁷ Chi Espíritu jeē ni jéhe Yaā Dios nuū yō, tu saha jeē yúhu yó nacani yó jnúhun, chi sa saha jeē iyó fuerza ini yō, jiín jéē cundáhú ni

yō jnáhan yō, jiín jeē ndíto íyó xínī yō. ⁸ Núu súcuante ma cúcanu rō nacani ndaā rō jnūhun máá Jítaho yō. Te suni ma cúcanu rō jeē siquí maá rí jeē íne ri vecāa siquí jnúhun ya. Chi sa cuāha ró jnúhun ndoho ró jíin rí siquí jeē cánacani yó jnúhun jnáma ya yohó, núu ndese ni jéhe Yaā Dios fuerza ini yō. ⁹ Chi ni jnama ya yohó, te ni cana ya yohó jeē coo ndoo ánuá yō cuajníñu yó núu yā. Te tu ní cána ya yohó siquí jeē váha ni sáha yó, chi siquí jeē ní tee ni maá yá jeē cundáhú ni yā yohó jeē yíhi yó ndaha Cristo Jesús. Chi nde ná tu jecōo ñayíví, te je cundáhú ni yā yohó. ¹⁰ Te vijna jeē ní quenda ndijin Jesucristo, Yaā jnáma yóhó, te ni steén cají Yaā Dios jeē cundáhú ni yā yohó. Chi máá Cristo ni snáā yā poder cuehyí jéhni yóhó, chi jíin jnúhun jnáma ya yohó ni steén cají yá nuū yō jeē cótecu yō nií cáni chi ma jnahnu ndetū yō.

¹¹ Te ni jeni Yaā Dios ruhū jeē nácani ri jnūhun ún, te ni tají yá ruhū cíuu ri apóstol jeē steén rí nuū ñáyuu tācá nación jeē tu jní jnúhun ya. ¹² Te siquí un cíuu jeē ndóho ri tāca jnúndóho yáha íne ri vecāa. Te tu cúcanu rí, chi jní rí ndese Yaā cíuu Yaā candíje ri, te cúcáhnu ni rí jeē cíuu coto ya jniñu jeē ní chihi ya ndaha ri nde vijna te nde quiví ndíji ya.

¹³ Te cuiñí níhin ró jíin tāca jnúhun ya jeē steén ndaā, suu jnúhun jeē ni stéén rí nuū rō. Te caca ró jíin jnúhun cándíje yó, te cundáhú ni rō jnáhan ró siquí jeē yíhi ró ndaha Cristo Jesús. ¹⁴ Te condito ró tāca jniñu váha jeē ní chihi ya ndaha ró, sáha poder maá Espíritu Santo jeē ndeé ini yō.

¹⁵ Je jní ró jeē tāca ñáyuu cágūcu Asia ni castóo i ruhū. Te uū i cíuu Figelo jiín Hermógenes. ¹⁶ Te

jícán tahú rī jeē cundáhú ni Jitoho yō ñayuu vehe Onesíforo, chi cuehē jínu ni nanihīn ni rī ni sáha de, te tu ní cúcanu de siquī rī jeē ní ine ri vecāa. ¹⁷ Chi sa suhva ná ni quiji de ñuu Roma, te ni nanducú yúcún de ruhū nde ni nanihīn de ruhū. ¹⁸ Te jícán tahú rī jeē maá Jítaho yō cundáhú ni yā de quívī ndíji ya. Te je jíní vāha máá ró ndese yōhyo ni chindéé ñahán de ruhū ná ni cahīyo ri ñuu Efeso.

Jeē cíuu yó nájnūhun soldado vāha nuū Jesucristo

2

¹ Núu súcuan te róhó, séhē mánī, na cóo fuerza ni rō siquī jeē yīhi ró ndaha Cristo Jesús te sáha ya jeē vāha róhó. ² Te tāca jnúhun jeē ní jini ró ní cahān rī, jítō jínūñ ñayuu cuehē, jnúhun ún na nástéén rō nuū tēe cásquícu vāha, návāha suni cuu stéén tucu máá de nuū sáva ga i.

³ Te róhó na cuándezí ni rō coto ró jnúndóho, chi cíuu ró nájnūhun iin soldado vāha nuū Jesucristo. ⁴ Ni iin soldado jeē íin nuū guerra, tu sájnénu de máá de jíin jniñu máá de, chi cánuú jeē sáha de máni máá jeē ndácu tēe ní tejníñu de. ⁵ Te suni súcuan tēe cásiquí deporte, ma nihín de premio te núu tú condihví ni de cosiquí vāha de máá modo chíjníñu. ⁶ Te tēe sájniñu níhín ñuhun, máá de cíuu jeē nihín xihna gā jeē cuáha itu. ⁷ Nacani ni rō siquī jeē cahán rī, te máá Jítaho yō sáha ya jeē jécuhun ni rō siquī ndihí.

⁸ Te cocuhun ndasí ni rō Jesucristo, Yaā ní quiji yucūn rey David, te ni natecu yā mēhñu ndíyi, nájnūhun cahán jnúhun jnáma ya yohó jeē nácani ri. ⁹ Te jeē siquí jnúhun un ndóho ri jnúndóho, te nde ni

cajihni i ruhū íne ri vecāa nájnūhun iin tēe ni sáha cuēchi xeēn. Te jnūhun Yaā Dios chi ma cíu cuhni i jeē ma cuité nūu. ¹⁰ Núu súcuan te jéndeyí ni rī jítō ri tāca jnúndóho yáha síquí jeē cundáhú ni rī ñayuu jeē ní nacāji ya, návāha suni cācu máá i jeē quívi i ndaha Cristo Jesús, te quihín i nuū cujéhnu i níi cání. ¹¹ Chi ndaā cahán jnūhun yáha:

Núu vēsú na cíu yō jeē síquí yā, te suni cotecu yō jiín yá,

¹² te núu cuandeyí ni yō ndoho yó, te suni ndacu yó jniñu jiín yá.

Te núu ma cuajnúhún yó yā, te suni ma cuajnúhún yá yohó.

¹³ Te vēsú tu squícu vāha yó, te máá yá chi máni squícu ya,

chi tu cíu sáfalta yā, chi squícu ya jeē ni cahān yā.

Tēe sájniñu squícu vāha jíín jnúhun ya

¹⁴ Jnūhun yáha na nástíhví ni rō ñayuu, te cahān nílin ro jíín i, jítō máá Jítaho yō, jeē ma téjnáhan i síquí tāca jnúhun sáá-ni. Chi tu ndé jéjníñu cuíti, chi sa stíví ñayuu jini sôho. ¹⁵ Te nducú ndéyí rō jeē cuajnúhún Yaā Dios rohó, jéē cíu rō téé sájniñu squícu vāha jíín jnúhun ya, návāha ma cúcanu rō nuū yā síquí ní iin, chi vāha nacani rō jnúhun ndaā yā. ¹⁶ Te ma quíví nduu rō jíín tāca jnúhun sáá-ni ñayíví yáha, chi suu sáha jeē ndúcuehē gā jniñu néé quívícoo ñayuu cácahān. ¹⁷ Te tāca jnúhun cástéén i chi cíu nájnūhun iin ndíhyí xeēn jeē sacahú gá cuahān. Te Himeneo jíín Fileto cíu uū tēe jeē casáha súcuan. ¹⁸ Chi tēe un ní cajica yátá de nuū jnúhun ndaā, te cácahān de jeē jé ní cuu ni canatecu ndíyi. Te súcuan cásaca nuu de xiní sava ñayuu

cácandíje. ¹⁹ Te Yaā Dios ni jeni ya ñayuu maá yá, te íyó cutú ndáā i jeē ma cáca yátá i, nájnūhun yósó nūū tútu iī: Je jíní Jitoho yō Yaā Dios tāca ñáyuu jeē yíhí ndaha máá yá. Te suni cahán: Tāca ñáyuu jeē ndácunehen síhví Cristo, na cújiyo i nuū jníñu néé, áchí.

²⁰ Te ini iīn vehe cahnu íyó cuéhē cohō, nasūu máni cohō oro cohō plata, chi suni cohō yujnu cohō ñuhun. Te íyó jéē fino te íyó jéē corriente. ²¹ Te nūu iīn ñayuu sándoo i máá i jeē quénda i nuū tāca jniñu néé, te cuu i nájnūhun iīn cohō fino. Te coo ndoo coo iī i nuū Jítoho yō, te nihñi jníñu i ndese cúní maá yá. Te coo tūhva i jeē saha i tāca jniñu vāha.

²² Núu súcuān te cunu ró coto ró tāca jéē tú vāha jeē cándiyo ni tēe suchí. Te condiquiñ rō jniñu ndaā, jiín jnúhun cándíje ró yá, jiín jnúhun cündáhú ni, jiín jnúhun coyūcu mánī jiín jnáhan. Te súcuān saha ró ndé jiín tāca ñáyuu ndoo ánuá jeē ndácunehen síhví máá Jítoho yō. ²³ Te ma quívī nduu rō jiín tāca jnúhun cánée íí jeē tu íyó cají, chi je jíní rō jeē saha jeē tejnáhan ñayuu. ²⁴ Te mozo maá Jítoho yō, tú vāha jeē tejnáhan de, chi sa suhva cánauú jéē coo vāha ni de jíín tāca ñáyuu. Te coo vāha ni de stéén de, te cuandeyí ni de jíín i. ²⁵ Te jíín jéē víta ni de te cani ichí de ñayuu níhni ni. Chi sanaa te nacani ni i saha Yaā Dios, te jecuhun ni i ndese íyó jnúhun ndaā. ²⁶ Te nducájí ni i te cācu i nuū jexeén jeē ní jniíi ún i, chi ni cundeyí jíín i jeē saha i jeē cúní maá.

Siquíndese coo ñayuu saha néé quívī cuándihí

3

¹ Te suni na jécūhun ni rō jeē quīvī cuándīhi te quee quīvī coo jnündóho. ² Chi coo ñayuu jeē chiñúhún máá, te ndiyo ni i xūhún, te sátéyí i máá i, te sándúxí i máá i. Te cahān neé i siquī Yaā Dios, te cunīhni ni i nuū tatá i nuū naná i, te ma nácuatáhú i, te ma chiñúhún i Yaā Dios. ³ Te ma cóo manī i jíín jnáhan i ni ma cundáhú ni i. Te sájnúhún i, te ma cúu casí i tāca jéē ndíyo néé ni i, te yōhyo xeēn coo i, te quītī ni i coto i tācā jniñu váha. ⁴ Te suni nastúu i jnáhan i, te ma yūhú i saha i cuéchi, te coo ndúxí ndasí i, te nducú i jeē cúsí ni maá-ni i, te ma nducú i quīvī i nuū Yaā Dios. ⁵ Te saha-ni i jeē chiñúhún i ya, te casí i nuū poder yā jeē ma sáma modo i.

Ma quīvī nduu rō jiín ñayuu casáha súcuan. ⁶ Chi savá tēe ún quīvī de vehe te stáhú de tācā ñahan cánée jéē iyó ndasí cuéchi. Te yachī quīvīcoo ña jíín tāca jnúhun tú ndaā jeē cúsí ni ña jíín. ⁷ Te vēsú niní scuáha ña na-ni jnūhun, te tu cúu cuiti jecūhun ni ña jnūhun ndaā yā. ⁸ Te nájnūhun ni casáha tēe tásí Janes jíín Jambres jenahán, jeē ní canducú de casí de nuū Moisés, suni súcuan saha tēe ún, chi nducú de casí de nuū jnúhun ndaā. Chi coo nee jeē níjnūní de, chi ma candíje ndije de jnūhun cándíje yó. ⁹ Te ma quée jniñu saha de, chi cuni tāca ñayuu jeē tēe cánée xínī cácuu de, nájnūhun ni cajini ñayuu jeē ni íyo néé xínī ndindúú tēe jeē ní nducú casí nuū Moisés.

Jniñu sándīhi ndácu Pablo nuū Timoteo

¹⁰ Te róhó chi je ni cutūhva vāha ró ndese stéén rī, ndese jíca ndaā rī, ndese tēe ni rī saha ri, ndese cándíje ri yā, ndese née ri paciencia, ndese

cúndáhú ni rī jnáhan ri, jiín ndese jéndeyí ni rī.
11 Chi ni cajito xeēn ñayuu ruhū, te ni ndoho ri jnūndóho. Te jíní rō tāca jéē ní ndoho ri ñuu Antioquía, ñuu Iconio, jiín ñuu Listra. Te jíní rō ndese ni cajito xeēn i ruhū. Te máá Jítaho yō ni jnama ya ruhū nuū ndihí ún. **12** Chi ndaā cíu jeē tāca ñáyuu jeē ndihví ni cuajníñu vāha nuū Cristo Jesús, ndoho i jeē coto xeēn ñayuu i. **13** Te ñayuu casáha jniñu néé jiín ñáyuu castáhú, chi sa víhyá gā cocuu i jíín jniñu néé, chi stáhú i ñayuu, te suni candíje máá i jnūhun stáhú.

14 Te róhó chi sa cuiñí níhin ró jíín jéē ní cutúhva ró jíín jéē ní cucáhnu vāha ni rō. Chi jíní rō ndese ñayuu cíu jeē ní castéén nuū rō. **15** Chi nde ná lulí ró, te je jíní rō ndese cáhán tutu ií jeē steén nuū rō ndese candíje ró jeē ni jíhí Cristo Jesús jehē rō návāha cācu ró. **16** Te níí tutu ií cíu jnūhun jeē ni cáhán Yaā Dios, te vāha níhín jniñu jeē steén nuū yō, jeē cahán nuū yō, jeē náchuhun ichí yóhó, jíín jéē scuéhnu yóhó jíín jniñu ndaā, **17** návāha tēe cájejníñu nuū Yaā Dios, ije ni de te coo tūhva vāha de sáha de tācá jniñu vāha.

4

1 Te cáhán rī jíín ró, jíto Yaā Dios jíín Jítaho yō Jesucristo, Yaā quiji ndacu jniñu, te sándaā yā jniñu ñayuu cátēcu jíín ñáyuu ní cajihí. **2** Cáhán níhin ri jeē na nácani ró jnúhun ya, te stíhví ni rō i candíje i. Te níní sáha ró súcuan núu núne i chí vēsú tu núne i. Te sáha ró jéē na jécuhun ni i, te cahán rō nuū i, te cani ichí vāha ró i, te jíín cuéhē paciencia steén rō nuū i. **3** Chi quee tiempo jeē ma cuajnúhún cuití ñayuu jnúhun ya jeē steén ndaā vāha, chi sa cuajnúhún

i jnūhun cúsī ni maá i, te nducú i cuehē maestro jeē steén nuū i máni jnūhun jeē nūjnahan ni i cuni nahín i. ⁴ Te cujiyo i nuū jnūhun ndaā, te condihvī ni i tāca jnūhun jeē maá cuento-ni cíu. ⁵ Te róhó chi níní coo ndito ni rō, te cuandeyí ni rō jiín jnúndóho, te condihvī ni rō nacani ró jnūhun jnáma ya yohó, te squícu vāha ró jiín jniñu ya jeē sáha ró.

⁶ Te ruhū chi je ni socō rī maá rí jeē cíu rī, te je cuacuyajni quiví cuu rī. ⁷ Te je ni cundeyí rí jeē ní nducú ndéyí rí siquí jniñu váha, te je ni jínu ni jica ri ñayíví yáha, te tu ní siáá rī jnūhun cándije ri yā. ⁸ Te vijna je íyó túhva premio jeē nihín rī siquí jeē ní jica ndaā rī. Chi Jitoho yō cuāha ya un nūñ rī maá quífví sánndaā yā jniñu, chi máá yá cíu juez ndaā. Te nasūu nūñ maá iin ruhū cuāha ya, chi suni cuāha ya nuñ tāca ñáyuu jeē cíu ni i jeē ndíji ya chi maní i jíin yá.

Jeē cána Pablo quiji Timoteo nuū de

⁹ Nducú ndéyí ró quiji yachí rō nuñ rī. ¹⁰ Chi Demas ni stóo de ruhū, chi ndíyo ni de ndajníñu ñayíví yáha, te cuahān de ñuu Tesalónica. Te Crescente chi cuahān de Galacia, te Tito cuahān de Dalmacia. ¹¹ Te máá iin na Lucas íne jíin rí. Te jeē quiji ró, te condeca ró Marcos quiji ró jíin de, chi vāha cuajníñu de jeē chindéé ñáhán de ruhū jíin jniñu ya. ¹² Tíquico ni tají rí de cuahān de ñuu Efeso. ¹³ Te jeē quiji ró, te condaha ró cotón jeē ni stóo ri vehe Carpo ñuu Troas. Te suni condaha ró tāca libro, te jeē cánuú gá cíu tācá tutu ní tee máá rí.

¹⁴ Alejandro, tēe cíu herrero, yōhyo xeēn ni sáha de jíin rí. Te máá Jitoho yō cuāha ya yāhu de jeē

súcuán ní sáha de. ¹⁵ Te condito ró máá ró nuū de, chi yōhyo ni cuu de contra siquí jnúhun cástéén yó.

¹⁶ Te ná ni ine ri jeē xíhna ñúhún núū tāca tóhō, te tú ni iin tēe ní índichi jiín rí, chi ndihí de ni castóo de ruhū. Te ñúhun ni rī jeē Yaā Dios cone cáhnu ni yā nuū de. ¹⁷ Te vēsú súcuán te máá Jítaho yō ni chindéé ñáhán yá ruhū, te ni jēhe ya fuerza ini rī, te súcuán ni sínu ri ni nacani ndihí ri jnúhun jnáma ya yohó, ni cajini nahín ñáyuu tācá nación tu jíní jnúhun ya. Súcuán ni jnama Jitoho yō ruhū nuū tāca téé xeēn. ¹⁸ Te jnama ga yā ruhū nuū tācá jniñu néé, te condito ya ruhū nde quīví ri andíví nuū ndácu ya jniñu. Te na cáhán yō jeē yóhyo luu cújéhnu ya nií cáni. Amén.

Saludo jiín bendición jeē sándihí

¹⁹ Te cahān rō jeē sándezí ni Prisca jiín Aquila, jiín ñáyuu vehe Onesíforo, achí rí. ²⁰ Erasto ni quendōo de ñuu Corinto. Te ni quendōo Trófimo ñuu Mileto, te cúhú de. ²¹ Te condihví ni rō quijsi ró nde ná tu quejéé vico míjin. Sándezí ni rō, achí Eubulo jiín Pudente jiín Lino jiín Claudia jiín táca gá hermano.

²² Te ñúhun ni rī jeē maá Jítaho yō Jesucristo na cóo ya jiín ró, te Yaā Dios sáha ga yā jeē váha róhó jíjnáhan ró. Súcuán na cóo. Amén.

**Nuevo Testamento en mixteco
New Testament in Mixtec, Atatláhuca (MX:mib:Mixtec,
Atatláhuca)**

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
9665e546-39d0-5bd5-8b10-38916a94951f